

Lo loup èt lo tchîn

Ïn loup n'aivait pus ran qu' lés oches èt lai pée
Taint lés tchîns fsint boinne diaidge.

Ci loup croueje ïn tchîn âchi foue que bé,
Grais, aivô di djèt, qu's'était predju poi médiaidge.

L'tchairdgie, l'botaie en moéchés,
L'chire loup l'airait fait bîn vlantie ;

Mains è fayait baitaiyie

Èt lo mâtin était chi grôs

Qu'è s'poéyait rvôdre sains botaie d'metainnes.

Dâli l'loup s'fait tot ptét èt s'aippreutche,

Ècmence de djâsaie èt yi fait dés compyiments

Tchu sai brètchelle qu'è révise.

È n'tînre qu'en vos, bé chire,

D'être chi grais qu'moi, yi réponjé l'tchîn.

Tyitties lés bôs, vos frèz bîn :

Vôs sembiabyes yi sont malhèy'rous,

Peuris, aibaingnous èt poueres diailes,

Qu'sont vnis â monde po meuri d'faim.

Poéche que ran n'ât chur : piepe ïn r'cegnon ;

Tot dait être diaingnie.

Cheûtes-me : vos airèz ènne bîn moiyoue vie. »

Lo loup eurprit : « Qu'ât-ce qu'è fâré faire ?

-Quâsi ran yi réponjé l'tchîn :

Bèyie lai tcheusse és dgens qu'aint dés souetas èt peus és aimeunous ;

Aimialaie cés d'l'hôtâ, bîn piaire en son maître :

Po çoli, vôt' paiye sré an n'peut meu :

Oches de poulats, oches de colons,

Sains djâsaie de totes lés çhaitries. »

Lo loup begne dje dains l'bonhèye

Qu'lo fait pueraie d'tarou.

Tot en mairtchaint, è voiyé l'cô pâle di tchîn.

« Qu'ât-ce que ç'ât ? qu'è yi dié.

- Ran. - Quoi, ran ? - Échtrèfaye.

- Mains encoé ?

- L'collie aivô l'quéi i seus éttaitchie

De c'que vos voites ât craibîn lai câse.

-Éttaitchie ? dié lo loup : vos n'ritèz pe dâli laivoù vos vlèz ?

- Pe aidé ; mains è n'm'en tchât.

- È m'en tchât aitaint que de vôs nonnes

I n'en veus de piepe ènne façon,

Èt po ci prix i n'voérôs piepe ïn trésoue. »

Aiprés çoli, chire loup é fut èt rite encoé.